

慧文正辨佛日普照元叟瑞禪師語錄卷第三 巖三

嗣法門人梵琦編

法語

示可宗禪人

我宗無語句亦無一法與人古人與麼道乎

巖三

地鑿成溝壑了也者裏裂破古人舌頭全心

即佛全佛即心道有亦得道無亦得道不有

不無亦得道不有不無亦得所以道法

無定相遇緣即宗可宗禪人由西蜀南詢志

高氣銳頗不為邪師惡友所迷謬謁余於不

動軒中因而問曰汝云可宗以佛為宗耶以

祖為宗耶以佛為宗佛無可宗以祖為宗祖

無可宗世出世間一切諸法悉無可宗汝之

名號從何而立宗曰宗既無宗可亦無可如

上所說莫便是某甲安名立號處麼余叱之

曰者野狐精向汝道一無可宗汝更要安名立號在

示闍侍者

佛法大事非劣根躁進可求辦悠久缺石身

心向自己脚跟下微細揣摩忽一朝桶底子

脫自然海印發光生絲毫異見作絲毫聖解

則又打入九十六種數中認賊為子矣三祖

云一種平懷泯然自盡德山云毫髮許言之

本末皆為自欺者箇說話十箇有五雙多成

蹉過四明闍禪人嘗侍吾香几於五髻山中

孜孜矻矻不倦於斯真末法英俊余懼其為

九十六種所攝持本地風光本來面目不能

顯發因述茲激其深造遠詣印板打來模子

脫出口傳心授以當宗乘今時普例邊事非

吾望也請自著精彩

示浩侍者

臨濟云夫出家者須辨得平常真正見解辨
佛辯魔辨真辨偽辨凡辨聖若如是辨得名
真出家若魔佛不辯正是出一家入一家喚
作造業衆生未得名為真出家人南陽忠國

卷三

二

師三喚侍者侍者三應家肥生孝子國霸有
謀臣國師云將謂吾孤負汝元來汝孤負吾
倒轉鎗頭了也鹽官國師喚侍者云將犀牛

扇子來貧時思舊債侍者云扇子破了也頭
落也不知國師云扇子既破還我犀牛兒來
窮淵須到底侍者無對蒼天蒼天又一尊宿
不赴堂侍者覆云和尚何不赴堂宿云我庄
上喫油糍飽傍觀者哂侍者云和尚不出門
因甚庄上喫油糍折箸攬滄溟宿云你去問
取庄主推惡利已侍者出門值庄主至云謝

和尚訪及疑殺四天下人天台浩侍者久棲
太白擇木寮盡得平石老禪要領魔之與佛
固是洞然明白只如國師三喚侍者三應那
裏是他孤負處扇子既破喚什麼作犀牛兒
既不曾出門因甚庄上喫油糍者裏個儻分
明者一隊弄泥團漢不消一鏤便見冰消瓦
解其或未然玄沙道底

示永禪人

七處九會同一菩提覺場三世十方同一毗
盧性海由根器之差殊致宗乘之各異茲乃

卷三

三

教乘中平常見解山陰永禪人昔嘗掉鞅其
間固是不勞拈出只如杜順云懷州牛喫禾
益州馬腹脹天下覓醫人灸猪左膊上明法
身耶讚法身耶纔思量擬議打入陰界去也
事上不明為事所障理上不明為理所障事

上見得爲事所刺理上見得爲理所刺刺拔
障除風縈金網榮祖云一種平懷泯然自盡
中峯門下拄杖且不打者漢亮座主參馬大
師始聞虛空解講之語拂袖便行稍有衲僧
氣息至於回頭轉腦之處打失鼻孔却乃一
生受屈當時若遇箇本色咬猪狗大手脚使
知有轉身一路豈止西山坐殺而已哉永寄
錫山中時一日來參余問云你是教庠人物
我且問你十方國土中惟有一乘法天台因
甚入教華嚴因甚五教永云春色無高下華
枝自短長余云屨屣見解永擬議余即打出
其時適有官冗未暇盡情祛其所繫相別歲
餘忽攜此紙需語爲江西沿途警策從而謂
曰情存聖量猶落法塵已見未忘還同滲漏
自東徂西二千里水宿風餐晨興夜坐時作

麼生道得十成絕滲漏之句以雪前恥

示康藏主

佛法無功用處一切平常著衣免寒喫飯止
飢而已你擬心思量他他且不是你思量底
你擬心莊嚴他他且不是你莊嚴底說得如
甕瀉水會得如刀破竹千里萬里愈沒交涉
所以道諸佛不曾出世亦無一法與人隨病
施方遂有三乘十二分教如將蜜果換苦葫
蘆淘汝業根汰汝情見只圖你作箇脫白露
淨無事衲僧豈有鍼鋒許實法與你作咀嚼
與你作蹲坐也你若不肯自信挑囊負鉢傍
人門戶求禪求道求玄求妙求佛求祖求善
知識以爲究竟以當宗乘譬如埋頭向西走
要取東邊物轉走轉遠轉急轉遲但切疲勞
終何所益豈不見爲山問香嚴我不問你平

生學解及經卷冊子上記得底未出胞胎未
辯東西時本分事道將一句來嚴懺然無對
屢上堂頭呈所解乞爲說破爲云我說得是
我見解終不益汝道眼嚴歸寮徧檢平日所
集諸方言句並無一語可酬此問自歎曰畫
餅豈可充飢以火一時焚却云此生不學佛
法也且作箇長行粥飯僧免役心神泣辭爲
山而去抵南陽觀忠國師遺跡遂憇止焉因
芟除草木拋瓦礫擊竹作聲忽然契悟沐浴
更衣望瀉山逢禮云和尚大慈恩逾父母當
時若爲我說安得有今日事也由是言之死
却現行滅卻意根全身放下有商量分聰
明智識嘍囉巧黠豈能希冀萬一

示印空禪人

迦又老子未出母胎便用箇無文印子將十

歲三

五

方虛空世出世諸法一印印定絲毫無有走
作及乎既出頭來隻手指天隻手指地周行
七步目顧四方乃云天上天下惟吾獨尊也
只用者印子起道樹詣鹿苑歷三百六十餘
會開八萬四千法門也只用者印子未後人
天百萬衆前拈金色波羅華普示大衆時迦
葉尊者破顏微笑便云吾有正法眼藏涅槃
妙心用付於汝也只用者印子由斯而降竺
乾四七唐土二三正按旁提橫拈倒用無非
此印之妙曹谿大鑿而下馬師一喝以來印
文大著如十日麗天纖悉其能隱遁光明俊
偉其亦極矣迨今年以來匡徒領衆者已
眼既已不明尋師擇友者信根又復昧劣各
以冬瓜印子遞相傳授顛顛顛預龍龍侗侗
如黑月夜行於險道印陵坑坎終不分曉蓋

爲來處不諦當遂乃如斯長沙潭禪人心憤
憤口悻悻要與從上佛祖雪屈因以印空自
號期揭此普示天下後世其高風英槩固以
超出時流數百倍矣更須和者印子一撲百
雜碎徑山老漢然後與汝三十拄杖

示紹藏主

道人之心其直如弦但無人我是非聖凡優
劣詐妄諂曲諸等過患自然得入無住心體
從本以來不是人不是我不是凡不是聖不
是心不是佛不是物不是禪不是道不是玄
不是妙只爲一念妄心分別取舍突然起得
如許多頭角被他萬境回換十二時中不能
得箇自由自在所以道尋牛須訪跡學道貴
無心跡在牛還在無心道易尋

海首座省親求示

庭三

六

伏馱蜜多問佛陀難提曰父母非我親誰是
最親者諸佛非我道誰是最道者佛陀難提
云汝言與心親父母非可比汝行與道合諸
佛心即是外求有相佛與汝不相似欲識汝
本心非合亦非離二大士鷲剎相逢顯揚此
箇法門如大日輪昇太虛空照四天下絲毫
無有障礙伶俐漢向者裏著一隻眼曠大劫
來舍身受身出胎入胎所生父母所纏愛網
一時裂破曠大劫來得念失念成法破法所
作事業所墮樊籠一時透脫內四大外四相
五聚十八界種種名言句義求其蹤跡了不
可得一切處一切時如龍得水似虎靠山於
一毫端現寶王刹坐微塵裏轉大法輪可不
爲世出世間真大丈夫哉洞山以不歸勸人
欲明此也黃檗身至庭闈不交一言而去揭

示此也老盧鬻薪而給睦州織蒲以養顯諸世相施諸人事非外此也或時與麼或時不與麼與麼不與麼皆吾佛大報恩之妙業火所燒迷雲所覆愛河中頭出頭沒豈足語此哉高安海首座法中俊人也一日以父死母

墓三

七

老言別西邁因舉那吒太子析骨還父析肉還母卻現本身爲父母說法而徵之曰骨既還父肉既還母喚什麼人作那吒太子海低頭問訊云謝和尚證明即書以爲贈其時實泰定二年七月十有九日也

爲渤海月軒朱處士掩土

盡十方世界是箇大光明藏從古至今無一法可增盡十方虛空是箇大解脫門從古至今無一法可減故我渤海月軒處士爲一鄉之善士作三界之韻人其在儒也則儒苑之

著龜其在佛也則佛門之墻塹雖示作有爲事而不滅壞無爲之相雖示學無爲法而不分別有爲之名雖示有功名富貴而不爲功名富貴所拘牽雖示有塵勞業感而不爲塵勞業感所汨沒拓本來田地顯自己家風以詩書振祖宗以禮義悅親友處夫婦如琴如瑟生子孫如鳳如麟行種種方便成種種因緣昔年全體與麼來地現酒中之影今朝全體與麼去鴻遺沙上之痕酒中地影既無實跡可留沙上鴻痕豈有真蹤堪戀七通八達了沒遮攔萬別千差都無罣礙正恁麼時歸根得旨末後光揚一句如何擎展一抔黃土蓋平生千古清風動巖穴

爲妙淨潔長尼起龕

見身無實是佛身山河大地迥絕異緣了心

如幻是佛幻草木叢林更無別法故我某人
現比丘尼身成大丈夫事拋玉樓金殿直趣
此宗挺鐵壁銀山單明自己廓性天之雲翳
蕩心地之塵昏透聲透色八面玲瓏亘古亘
今十方通暢毋固毋必能柔能綱道契南北

卷三

兩朝名滿東西二淵靈機活脫劉鐵磨未足
觀光智鑑虛圓凌行婆亦須退步全體是箇
解脫大海全體是箇涅槃妙心無起滅可求
無生死可出百骸潰散卓爾獨存四大分離
湛然常寂正與麼時身裏出門即不問門裏
出身作麼生毗盧頂上從來往安樂邦中任
去留

答慈雲珽長老嗣法書

警知客來得所惠書就審體候安和且知四
衆所推瑞世大方一香不忘靈山道聚之舊

與今時趨炎附勢待價而沽不原所自者大
有徑庭矣既得座披衣入者行戶作者蟲豸
不可容易山不讓塵故能成其高海不讓流
故能成其深一切處一切時但只鋪心如地
久久自然靈驗或些少魔孽亦當自化先聖
有云昔在佛樹力降魔得甘露滅覺道成斯
之謂也缺齒老胡十萬里西來單傳心印直
接上根二祖三拜得髓後復說四行以傳於
今何也深慮後人爲喜風所飄瞋火所燒隨
世遷流有失正念之故宜深思焉上堂提唱
卷三
務在單提箇事開悟人天前則馬祖百丈德
山臨濟後則大慧應庵縱橫波辯直達心源
得大自在無出曹谿盧祖皆可爲法輒嫩嫩
曲彎彎打入今時口傳耳授隊中強生節目
疑誤來學非吾望也爭人爭我以當宗乘行

九

盜行淫而爲佛事劫掠常住結好貴人冒稱
善知識出佛身血之徒豈堪共語未聞幸自
保愛

偈頌贊

示魂上人

爾家一字之寶王星喻劫來無有二無今無
古無死生日日放光光動地釋迦彌勒是他
奴外道天魔總其侍隨時任運本騰騰蹉脚
便遭魔境累惡業猛火燒須彌長墮三途受
顛躓大千沙界海中漚況乃文章一小技此
心若善自知非何處別求直實義

贈上天竺偉首座

台衡以三觀爲正傳嵩少以一心爲直指會
則事無兩般不會則千里萬里各開戶牖萃
英髦虎驟龍驤知幾幾上人間出多慷慨誓

將生死窟根株平生足跡半天下豈肯汨沒
文字海中甘作鑽故紙之蠹魚德山見龍潭
便乃燒却鈔疏良遂參麻谷便乃散却講徒
男兒曠達有如此光明烜赫何代無光明烜
赫何代無

送聞禪客歸淨慈

鎗其脣劒其舌劈面機電光掣蕩二三直指
之流蓬掃四七單傳之落葉爭如默坐解空
人一字當年不曾說諸天讚歎復兩華千古
清風動巖穴聞禪聞禪歸去來草鞋根斷空
塵埃南屏幸有舊泉石何妨且臥雲濤堆

示潔上人

本源自性佛妙應無真形千身總幻相萬法
皆空名迷頭認影不知歇如飢喫鹽添得渴
澄神靜慮而無爲似水浸石空經時鉤章棘

句說道理癡狂業識徒勞耳老胡昔日南天
來九年面壁高山隈別無毛髮可傳授只要
當人心眼開出蓋纏脫羈鎖要行即行要坐
即坐南北東西無不可山僧與麼葛藤如邀
空華還結空果平白重重成話墮潔禪潔禪

會麼會麼

山房自述

故園歸路隔天涯絕頂閒房且寄家
罷罷具多山月上一棚華影漾袈裟

雪樵

珠霞飄飄柴在肩且謀燒火過殘年
庭前此際無人立爐內憑誰續斷煙

寄希白藏主

青杉高簇天仁者此安禪雙澗水回
合四山雲接連燈分紅燄遠茶點白
華圓別後爲誰

巖三

土

語祖門玄又玄

悼通靈仲

古今人所共如電閃青天一相不二相
千年還萬年院烏雲塢竹塔面石峯
蓮因想遊從舊閒心亦悵然

送勝上人歸省方山和尚

徐家園裏莧菜根殺人活人妙無敵
丈夫不自守箕裘臘縣遊州竟何益
秋風滿眼多塵沙客途雖好爭如家
結束衣囊快歸去此身且免空波吒
阿師心事吾所識天台寥寥眼雙碧
若問參尋事若何切忌當陽亂拋擲

題水月援圖

水中明月輪可翫不可覓探援徒自
狂觸破寒潭碧

深源

大法之本根如淵杳無極趙州探菜萸拄杖
空靠壁

答竺元和尚二首

此時有院不愛住間在江皋自隱居劫火灰
飛大千界普光心印只如如

出息常不保入息年來况乃病猶多故人襟

義高千古忽枉瑤華到薜蘿

次韻答林首座二首

一房間寄長松下殘喘雖留如病何爲報南

山舊玄侶幻華光景已無多

祖師門戶無關鑰今古誰云到者稀兜率宮

中恣遊戲對揚曾不負來機

寄東嶼和尚

相別於今八載餘君匡徒衆我閒居白雲流
水乾坤外終不相親在寄書

廿三

十二

經故人別墅

門徑無塵有綠苔東風落日舊曾來白頭道
者今何在一樹櫻桃華自開

送亮上人歸甬東

有口莫喫趙州茶有眼莫覩靈雲華毗盧心

印廓寰宇今來古來常無差吳江裂地直節

嶺摩天斜或泉或石井草木或雲或月兼煙

霞萬像森羅總惟我十方刹土曾非他業海

衆生自迷悶合塵背覺成諠訛輒勿鹵鹵莽

莽直須吒吒髭髭跨德山臨濟超彌勒釋迦

拈一機明中洞邊示一境顯正摧邪千人萬

人近傍不得直下如蝎如虵是爲了事真衲

僧高奮金策遊天涯

送方上人西蜀省親

道本絕方所隨緣觸處真家鄉元不遠父子

即非親徑薛粘輕策江華拂淨巾東吳與西
蜀曾不問纖塵

師殊讚

七佛之師只者便是形現百千劍去久矣

明藏主手製竹拂爲惠偈以謝之

巖三

十三

儵然香且潔拈出幾人知節抱冰霜勁姿含
水石竒憐君能製作媿我嬾提持懸向繩牀
角因懷馬簸箕

悼靈座主

道不分年少朝聞夕可亡講精文徹梵吟好
句諧唐託質思他界遺骸厭此方台宗舊遊
在名共白雲香

送初西堂遊江西

由吳西入楚風雨正秋殘不愛住山樂豈辭
行路難江明齋鉢淨嶽靜夜燈寒爲了玄中

肯胸襟肯自瞞

次晦機和尚韻送悟上人歸徑山

瓦缶固已無黃鍾雪曲豈混巴歌中石房嶢
巖自丘壑兀坐贏得閒觀空上人何從悟玄
旨了知是法非文字高高解窺千仞巔深深
能極九淵底歲晚相看正搖落此身勿訝無
錐卓歸去凌霄古寺間且聽松風撼喬嶽

寄晦機和尚

流落似孤蓬君西我復東二千里外一十
五年中老去頭毛白寒來樹葉紅所期盤石
上松月夜禪同

送張中丞北歸

并序

大德八年十一月御史中丞張公以榮祿
大夫行宣政院使至之日凡政之不便於
僧法之有叛於佛者一掃而刮絕之人神

悅和上下胥慶十年春公赴召中天竺野
叟某說山偈以贈云

我佛如來無上尊其法充滿大千界從塵沙
劫至今日無一處所而不周世有奇特過量
人現宰官身為弘護遙奉玉音來自天為此

三

高

大法之墻塹以勇猛力制羣魔以慈憫心拯
衆苦瓦礫化為觀史天寒者得衣飢得食譬
如清涼之寶月一切物像悉皆照又如摩尼
之寶珠一切塵泥不能染不出當人一念中
成就如上勝功德此勝功德既已成一念之
中亦無異人人同以此一念願公壽考康且
強永佐金輪聖天子對揚休命恢此宗

寄無維那七首

從教入禪今古有從禪入教古今無一心三
觀門雖別水滿千江月自孤

文字波濤如大海窟源徒只因心靈德山棒
打四天下早歲何曾不講經

化儀無假無不假化法無空無不空陝府鐵
牛耕大海西天夜半日輪紅

重玄疊妙兩交加病眼還應見黑華梁上爐
灰那是飯盞中弓影奈非蛇

頂門有眼要須開莫待天明失却雞八萬四
千諸法相但將黃葉止兒啼

古德不離方丈內云胡庄上喫油糍三賢十
聖猶迷惜八教闍黎豈得知

三

五

青天時雨講華新離却言詮有幾人教網鞆
鞆大千界只應良遂是金鱗

次橫山和尚韻

匡徒領衆知多少盡把龜毛拂一枝靈鷲山
中手頭短祇將掃帚畫蛾眉

栽松

鈍履橫肩雪未消不辭老步上岩巖等閑種
得靈根活會看春風長綠條

示有上人

有身便有世間事心念如何得會無將滅止
生生止滅猶如水上捺葫蘆

示徒弟天啟

真箇龍生金鳳子自然衝破碧琉璃池中鷓
鷓只癡憎脚下魚遊都不知

出隊寄歸示眾

益孟有口吞千界寶藏無肩洞十方七佛以
前一段事相逢誰肯便承當
太湖三萬六千頃垂白西來把釣竿蝦鱉魚
龍都不見月明空照夜濤寒

化浴

欲洗勞生曠劫塵灰寒火冷旋添薪老僧別
也無他意只要當人悟水因

黃河舟中示善藏主二首

濫觴能起滔天浪輒莫隨流便入流合眼跳
來開眼看要分清濁在源頭

東湧未停西復起憑君且勿怪黃河五千餘
卷毗盧藏早是無風市市波

草堂陵藏主火浴牙齒數珠不壞堅
固尤多因為說偈八首

火令孤煙息悠然見本真金精都絕鑛珠瑩

巖三

士六

迥無塵不住光明藏非離穢惡身天魔難測
處幾度劫華春

幻體雖空了光明在翠峯冰霜一具齒鐵石
幾生心烈燄終難燎飛埃豈易侵古藤人去
後寥落到如今

三十有一歲精修世少知五千編貝葉百八
顆輪珠念念總無別心心寧有殊金剛同不
壞歷歷照昏衢

此日茶毗畢因君笑復悲生來誰是我死去

我名誰石女夜懷孕木人朝養兒本無形與

相何處有虧危

東西諸祖塔曾已徧參尋般若謾多體涅槃

惟一心芙蓉數覺海蒼蘆綻禪林劫火洞然

後清芬騰古今

悟了空王法乾坤任去留偶爲雙徑住又作

九蓮遊月冷金臺夜風生五沼秋鄉關楚江

上誰爲話踪由

出生兼入死此事本來同常寂光明裏真空

境界中諸塵無隔礙衆法盡圓融一箇閒皮

袋何曾是我儂

七

七

破屋孤峯頂因思在去年分香朝誦呪聯榻
夜修禪解脫華同綻菩提果共圓胡爲先我
去令我獨悽然

山居二首

山水交柯莎滿庭馬蹄且不污巖扃篝燈對

雪坐吟偈擁衾繞泉行課經睡少每知茶有

驗病多常怪藥無靈金園一歲一牢落誰似

孤松長自青

小榻新營巖瀑西白雲無路草萋萋月明扃

戶野猿嘯日晏擁衾山鳥啼積世詩書空簡

盡累朝墳墓只田犁邯鄲驛店一炊黍堪笑

古今人自迷

中山

四方八面絕躋攀直下孤危透頂寒多少時

人外邊覓却從平地起峯巒

月舟

冰輪夜冷水天空萬里清光一櫂中七百高
僧撐不上黃梅贏得送盧公

贈日者

年今八十有三歲來日難侔去日長為報諸
方無別說木裁直礙是行裝

贈醫牙道士

牙齒分明一具骨十中今只二三存先生若
不重栽種老去如何咬菜根

示龔鋸匠

萬物與我同本根隨心所向悉皆見當機一
截心手忘一片由來對一片

示寫神黃德中居士

空華影裏人天相石火光中驢馬形歷劫分
明至今日如何描貌上丹青

巖五

十八

因書前偈畢德中拱手而問云正與麼時
徑山老漢在裏許不在裏許師云盡大地
是端上座頂相你向什麼處分辨德中罔
措再示一偈

千身彌勒牛犖角八臂那吒馬踏蹄一相之
中一切相僧絲何處辨東西

示刀鑷金生

五蘊山頭一段事黑漫漫又白漫漫圓光要
得洞天地試聽金刀為舉揚

送瑩上人廣州省師

禪者流非尋常當機著著須超方一語一默
兮解脫光明之藏一出一沒兮神通遊戲之
場三十四老尚非侶肯與浮世爭茫茫徑塢
之巔羅浮之址彼兮此兮無是不是師也資
也殊未忘滅卷寒雲二千里虎驟龍馳相見

時佇看平地清颺起

朱居士化姜芋以實齋庖因示之

佛功德海不可量有如虛空含眾像園林衣食及臥具作諸佛事隨所須姜芋為物雖甚微能滅世間飢火苦納諸香積國中香氣

巖三

十九

周流十方界乃知一切諸眾生具有無邊佛功德佛之功德非有無眾生心量亦如是而我現前諸衲子實無能受所受心檀波羅蜜眾上人亦無能施所施者有無能所二俱遣空之一字還非真是名為佛最微妙世出世間難思議

趙李倪三居士建凌霄會求贈

雙徑在吳淞實為山之雄天目如屏擁其北錢塘如練紆其東重巒疊嶽不知幾千萬數但見五峯秀色普翠摩青空下有跋難沙竭

神龍之窟上有觀史夜摩之宮晴雲暖靄生巖松朝開暮合無終窮祖師據之而鞭麟笞鳳靈物依之而給兩支風參玄上士由之洞森羅寶印明萬像真宗納須彌於芥子卷法界於鍼鋒皆本源自性之常分且非妙用并

神通諸上善人登此山預此會者境由心攝事得理融治生產業皆與實相不相違背儼然如鹿園鷲嶺觀紫金光聚於百萬人天之中說法至今猶未散天華如雨飄空濛噫四生紛擾兮白雲蒼狗倏變滅五欲驅馳兮驚濤駭浪常撞春苟非冰懷雪慮而栖禪此地今其將曷從

因上人求字於予字曰躡之仍為說偈

在昔躡菴公曾居淨因寺廓徹賢首宗洞達

西來意五教一喝分光明照天地子今名淨
因欲以何爲字吾字曰瞞之慕蘭乃其義倘
不昧斯言古人豈難至祖肩擔大法行看契
吾志

清首座拭經火綿得舍利請說偈

巖三

二十

此摩尼珠常照世間謂從經出特地顛預謂
因綿有瞞人自瞞非即非離透膽光寒如日
瞳瞳如月團團無壞無雜影現萬端作是觀
者名爲正觀若他觀者名爲邪觀

月印池亭爲廉公允同知賦

明蟾天上飛與此不相接清泉地中行與彼
不相洽胡爲蟾與泉彼此相含攝由彼蟾之
明萬像悉昭晰由彼泉之清纖塵難汚雜以
茲清且明光影兩和叶照古復照今瑩徹百
千劫偉哉公允公亭扁竟高揭使人登斯亭

憑欄洞眉睫心源常若茲迥脫黑暗業

已茅屋坐化偈以悼之

圓明實性絕修持亘劫何曾有壞時五十八
年一茅屋從教業火自闍維

靜軒

六戶虛疑湛不搖從教塵世自誼囂塔前盡
日無人到只有閒雲伴寂寥

海翁

窮盡波瀾絕一漚餘生甘自老扁舟四溟高
臥月如晝閒把漁蓑枕白頭

巖三

二十

示心上人

即心便是佛離心別無佛外求有相佛非汝
本真佛

示圓覺居士

性覺本圓塵塵無礙諸佛祖師別無三昧

擬寒山子詩四十一首

百千諸佛師只者心王是廓然舍十虛靈明
妙無比棄之而別求機巧說道理非徒誇宗
乘亦乃謾自己

出家學參禪只要了生死生死不了時非干
別人事疾病被他牽強健被他使推尋不見
他無名又無字

權門有貪狼掠脂又剝肉一已成喜歡千家
盡啼哭溢窖堆金銀盈箱疊珠玉只知丹其
穀不知赤其族

此箇血肉團也須識得破飲食聊資持衣裳
暫包裹中有寶覺王常居法空座相逢不相
識永劫成蹉過

何事居此中此中絕塵跡盈朝霧濛濛竟夜
泉瀝瀝噴吼四面山礫砢一拳石高眠百無

憂任你春冬易

城中一少年容貌如神僊身披火浣服手把
珊瑚鞭常騎紫騮馬醉倒春風前三日不相
見聞說歸黃泉

吾家有一物出入身田中趨渠渠不去覓渠
渠不逢賑渠渠不富劫渠渠不窮圓光燦萬
像如日遊虛空

形本無其形分彼復分此名本無其名攻非
復攻是一朝兩眼閉送向荒山裏蓬蒿穿罅
體誰管他與你

巖室

主

昨日東家死西家溥冥財今朝西家死東家
陳奠杯東東復西西輪環哭哀哀不知本真
性懵懂登泉臺

近來林下人多學塵中客養婦兼養兒買田
復買宅善果無二三惡因有千百他日閻王

前恐難追其責

古今學僊者煉藥燒丹砂七龍兼五鳳期以
昇紫霞一朝兩脚偃骨竟沈泥沙前路黑如
漆苦哉佛陀耶

佛以慈悲故金口宣金文三百六十會八萬
四千門顯此本有性隨彼衆生根似劍斫虛
空何處求其痕

人生在世間其才各有施大非小所堪小非
大所宜若使堯牽羊而令舜鞭之羊肚不得
飽弄舜空自疲

田園草舍間男女每團圍摘果謀供客繚絲
備納官婦憂夫貌悴母憂子身寒一箇溘然
死號咷哭繞棺

心爲萬法宗萬法因心有心空萬法空生死
沒窠臼世間多少人聞法不聽受騎驢更覓

巖三

三十一

驢顛倒亂狂走

有婦眩顏色折華吳水春繡裙金蛺蝶寶帶
玉麒麟窈窕言無敵娉婷謂絕倫誰知楊氏
女骨化馬嵬塵

木落秋水寒千峯正岑寂惟聞虎嘯聲不見
人行跡霜露濕巖莎月輪掛空碧此時觀此
心獨坐磐陀石

世有無上寶其實非青黃在人日用間皎潔
明堂堂萬像他爲主萬法他爲王與他不相
應盲驢空自行

名利是何物人心自不灰榮來終有辱樂去
可無哀富塚草還出貧門華亦開耕桑枉辛
苦鬢白鬢毛衰

生知生是幻則生可以出死知死是幻則死
可以入智士登涅槃癡人受羈馱本身虛舍

那只要信得及

世有一般漢實少虛頭多口中一片錦肚裏
森干戈真佛自不信喃喃念彌陀饒你見彌
陀彌陀爭奈何

浮世空中華只今須勦絕四蛇同篋居兩鼠
共藤齧六道常輪迴三途每盤折一生百千
生何時得休歇

今古一場空憑誰較吉凶巴歌攬白雪瓦缶
亂黃鐘運去虎爲鼠時來魚作龍賢明貧軼
軻癡騃富雍容

偃仰千巖內超然與世違采芝爲口食紉樹
作身衣瀑水淋苔磴湫雲漬草扉閒吟竺儂
偈幾度歷斜暉

人生無百年業累有千般姦詐盈腸肚貪婪
滿肺肝聲爲聲誑惑色被色欺瞞欲脫輪迴

巖三

十四

去如斯也大難

山中高且寒人罕來登陟松搖雪珊珊蘿罥
煙囂鼻巖華春不開潭冰夏方釋住此夫何
爲心源湛而寂

我住在峯頂白雲常不開窻扉沿薜荔門徑
疊莓苔山果獲偷去巖華鹿獻來長年無一
事石上坐堆堆

紙薄未爲薄人薄方爲薄虎惡未爲惡人惡
方爲惡虎惡尚可防人惡難捉摸紙薄尚可
操人薄難憑託天堂是自修地獄非他作何
如早皈依如來大圓覺

東海揚蓬塵青山作平地王母蟠桃華迢遙
不知處人生能幾何剛抱千年慮芭蕉欲經
冬秋來早枯悴

磨甑不成鏡掘地難覓天如何苦死坐要學

如來禪欲識如來禪歷劫常現前卷之在方
寸舒之彌大千耆婆不得妙烈火開金蓮
報爾參玄人及早須猛省心佛皆虛名浮生
只俄頃莫待無常來臨嫁却醫癩
我笑一種人平生好輕忽讀書不曾精開口

巖三

三五

輒罵佛佛者覺義也何必苦罵之古佛去已
久罵之徒爾爲覺即覺自心常令無染污寶
月琉璃中光明洞今古心外無別佛佛外無
別心此心若不信六道長漂沈西方大聖人
況乃孔丘語吾儂非謬傳你儂須聽取

祖師鐵牛機虛空沒關鎖須彌上搖船大海
裏燒火放去非屬他收來豈存我咄哉啞羊
僧如虎觀水磨

高高峯頂頭闌寂無人遊煙雲日夜起崖樹
風颼颼巢鶴作鄰竝野鹿爲朋儔渴酌巖下

水寒拖麤布裘捫蘿陟危嶠跼石窺遐陬盤
桓倚松坐俛仰時還休逢春恰如臘在夏常
如秋長年沒羈絆終身有何愁東西市鄺子
苦火燒髑髏今生不了絕更結來生讎

人生在世有何事日用但教心坦平珠與金
銀衝屋棟到頭難免北邙行

衆生所抱病根別諸佛因談藥味殊別亦不
真殊亦妄妄窮真極本如如

因果歷然如指掌顛頂莫謾過青春皮囊出
了又還入六趣茫茫愁殺人

天上日沒月又出山中葉落華還開黃泉只
見有人去不見一人曾得回

當人早早宜自修歡樂何曾有終畢長安陌
上貂錦兒祇恐無繩繫白日
業風鼓擊枯髑髏貪心如海不知足諸佛悟

之登涅槃衆生從此入地獄
事過都是空事來本非有請君聽我言莫做
無明酒

觀音讚二首

三十二應身十四無畏力如日遊虛空何處

卷三

三六

有蹤跡

籃裏錦鱗活鱖鱖地提起便知早落第二

題羅漢圖

諸諦空來世所無神通百變絕名模不知何
處有蹤跡却被人傳作畫圖

題牧牛圖

誰家荒曠連平原何處孤村帶喬木官田耕
盡牛正閒且對東風弄橫玉

須菩提尊者讚

雨華曾動憍尸迦讚歎重重世稀有可惜手

中麤刺藜當時不與劈脊樓

賓頭盧尊者讚

神通妙用總饒伊我且分明一問之手策眉
毛不曾放何如煩惱未空時

寒山拾得讚

作偈吟詩既村且野謂是文殊吾不信也

燒火掃地掣風掣顛安得佛世有此普賢

朝陽穿破衲對月了殘經讚

線澀眼正昏俄逢太陽照冬來天正寒且補
者一竅冰輪飛上大空庭白如晝此帙偶未

卷三

三七

終非貪數黑豆

達磨大師真讚二首

長江十月浪滔天脚踏莖蘆去如箭闔國人
追不再還爭如莫上梁王殿

震旦來求大乘器分明杓卜聽虛聲當時幸

遇梁天子得脫渾身出鳳城

鼓山晏國師真讚

聖箭射入九重城曾郎憐兒不覺醜南國攪
得沸如湯大地山河顛倒走

大慧和尚真讚

眼蓋五天宵吞四海碧眼胡以之不直分文
黃面老因之倍增光彩斷妙喜世界如陶家
輪置須彌盧於蝸牛角上無不得大自在臨
濟一宗由是大興於世豈趨冥騫暗小根魔
子所得干免

中峯和尚真讚

巍巍堂堂煒煒煌煌言無舌而充塞乎五湖
四海名無翼而軒翥乎九有八荒其廓徹也
似備頭陀契機空峯之毬室其痛快也如忠
道者悟旨佛眼之磨坊由是四十年不下西

天目即青山白雲為寶華王獅子高廣之座
與森羅萬像同一敷揚斯所以鍾普明一門
之秀聯慧朗三世之芳也

斷崖義首座真讚

天目之白雲不白天目之青山不青只者是
渠真面目莫聽斷崖流水聲

東嶼和尚真讚

明水大羹其純淡也渾金璞玉其粹溫也揚
蓬塵於海底摘揚華於火中其妙而不痕也
西丘三世之重南宕一門之秀賴以獨存其
袒肩擔荷之功尚何言也

福臻琦長老請讚

以下師自贊凡六首琦即楚石也

心直如絃性急似箭觸著則發無背無面父
藏叟不設藏叟門庭祖大慧不識大慧機變
福臻手眼既通身切忌隨他脚跟轉

隆教銘長老請讚

謂是徑山本無此相謂非徑山今有此相說
是論非轉增刁妄古鼎長老要作他家兒孫
直須燒却此幘三世十方空蕩蕩

五祖意長老請讚

非驢非馬百無所長三十年間四坐大牀只
將真實兩字自謂高出諸方即此為黑暗崖
照夜寶炬即此為濁惡海濟人舟航譬如煮
沙欲成佳饌而擬填末法無底之飢瘡庭栢
從渠既久知渠肺腸要須別資一路却成大

樹與世作陰涼

鏡中居士請讚

處世甚疎謀生至拙其天矯也青山有雪之
松其皎潔也碧落無雲之月共佛祖若仇若
讎與衲僧為妖為孽三十年四著戲衫皆諸

巖三

三九

方之所不悅鏡中居士菴提遮知心豈在多
饒舌

徒弟惠玘都寺請讚

有擒虎兇機謀無辯龍蛇眼目坐斷天下徑
山須是者箇瞎禿

慈侍者請讚

百無所長眼空當世厭鈍德山點汚臨濟言
稱大慧嫡孫直是令人耐耐當機些子不容
情偏與衲僧作冤對

慧文正辯佛日普照元叟端禪師語錄卷第三

音釋

牙 丈几切池上聲蟲牙 髦 莫毫切音毛俊
有足曰蟲無足曰牙 髦士中之俊如
毛中 齶 蘇秋切音囚 累 上魯偉切音壘
之鬣 齶 首萃山峻貌 硯 與磊同下魯果
切音裸磊 吽 徒刀切音陶 娉 上匹正切
硯 泉石貌 吽 號吽哭聲 娉 音聘下唐

丁切音廷媵
媵美好貌
墮土緩切
墮所踐處